

赤溪縣志卷八 附編

赤溪開縣事紀

謹按五嶺以南民風強悍械鬪之事時有聞焉然
有此族與彼族械鬪或此鄉與彼鄉械鬪殺掠相
尋爲害雖烈一經鄰紳調停或由官吏制止其事
遂寢但未有仇殺十四年屠戮百餘萬焚燬數千
村蔓延六七邑如清咸同間新甯開平恩平鶴山
高明等縣土民與客民械鬪受禍之慘也今赤溪
縣民卽原居新甯籍之客民也自經巡撫蔣益澧
止鬪聯和劃廳分治土客相安垂五十餘年於茲
矣然在當日各縣土客因分聲肇釁互相屠殺卒

登記號 77037

38年3月2日

913733
4032
5

至兩敗俱傷死亡相等逞忿私鬪甯有幸耶及今思之不寒而慄茲者民國肇興改廳爲縣乃就採訪所得及參考官書將赤溪縣民遷徙之所由來與夫土客鬪禍之所由起止以紀開縣始末至所述鬪事以溪民原隸甯屬故詳於新甯而開恩高鶴等縣亦略及之往事是瞻足爲殷鑑欲使後之覽者知所儆惕焉云爾

溪民遷居之始

清康熙元年以臺灣賊鄭錦擾及粵疆詔瀕海各縣居民內徙五十里三年又因番禺蛋賊李榮等之亂恐遷民仍通海舶續徙近海之民於內地因是遷徙

民至窘匱無以資生漸漸死亡者十不存其八九以致遷地空虛盜賊益肆七年巡撫王來任以縮地遷民爲非策疏請展復兩遷地界聽民復居奉旨依議

參廣州府志

附王來任原疏邊界宜展一則云一粵東之邊界宜速展也粵負山面海疆土原不甚廣今概於濱海之地一遷再遷流離數十萬之民每年拋棄地丁錢糧三十餘萬兩地遷矣又在在設重兵以守其界內立界之所築墩臺樹椿柵每年每月又用人工土木修整動用之資不費公家絲粟皆出之民力未遷之民日苦派辦流離之民各無棲止死

喪頻聞欲生民不困苦其可得乎臣請將原遷之
界急弛其禁招徠遷民復業耕種與煎晒鹽斤將
港內之河撤去其椿聽民採捕海內之兵盡撤駐
防沿海州縣以防外患於國不無小補而祖宗之
地又不輕棄更於生民大有裨益如謂所遷棄之
地丁雖少而禦海之患甚大臣思設兵以衛封疆
而資戰守今避海寇侵掠慮百姓之資盜糧不見
安攘上策乃縮地遷民去其門戶而守堂奧臣未
之前聞也臣撫粵二年有餘亦未聞海寇大逆侵
掠之事所有者乃是內地被遷逃海之民相聚爲
盜今若展其界邊卽盜亦賣刀買犢矣舍此不講

徒聚議以求民瘼皆泛言也

邊界雖復而各縣被遷內徙之民能回鄉居者已不得一二沿海地多寬曠粵吏遂奏請移民墾闢以實

之於是惠潮嘉

卽清惠州潮州嘉應州郡名

及閩贛人民挈家赴

墾於廣州府屬之新甯

今改台山

肇慶府屬之鶴山高明

開平恩平陽春陽江等州縣多與土著雜居以其來白異鄉聲音一致俱與土音不同故概以客民視之

遂謂爲客家云

按吾粵各族散居於梅循

卽清嘉應惠州二屬

南韶連肇及

沿海諸州縣所在繁殖然攷各州縣志乘所載其

先世俱是中州黃光間遺族於晉漢間因中原板

蕩五胡亂華遂多渡江南遷於江浙閩贛諸省至

五代南漢以迄宋室播遷嶺海時因於扈從避亂

復由閩之汀州贛之贛州轉徙南下分居於梅州

全屬五縣潮州之大埔豐順循州之歸善今改博惠陽

羅河源龍川連平永安今改紫金長甯今改新豐和平及北

江南韶連所屬區域其後各地生殖日繁於明季

清初又多遷移於廣屬之番禺東莞香山增城新

安今改寶安花縣清遠龍門從化三水新甯肇屬之高

要廣甯新興四會鶴山高明開平恩平陽春以至

陽羅高雷諸屬州縣或營商寄寓或墾闢開基亦

先後占籍焉大埔林大僕達泉所著客說謂嶺表

客家多中原衣冠之遺或避漢末之亂或隨東晉南宋渡江而來其語多含中原之音韻又史載宋

末文丞相天祥率師勤王由虔

即今贛州

復梅招集義

兵客戶從之所至爲家是則客族自宋以前已流播於大江南岸諸省而後逐次移殖於五嶺之四隅其說固有足據又大江以南無論江浙閩贛粵桂是何省何州府縣凡說客話者雖其聲音各因水源之變異微有高下但一經接談皆可十九相

通且與河南光州光山固始等縣語言無甚差異

林達泉客說謂客於縣而他縣之客同此音於道於省莫不盡然以視府而他府之客同此音於道於省莫不盡然以視廣肇土話複雜不一致間有隔縣或稍距十數里卽至彼此不能通曉者未可同日而語是故

諸家著論多謂客家來自中州爲黃光間遺族亦
信而有徵也唯是而論則吾粵客族其初遷於梅
循南韶等州縣者是皆篳路藍縷以啟山林民雖
稱客仍屬土著是以子子孫孫繼繼繩繩其轉遷
於廣肇羅陽等州縣者凡膏腴地域已先爲土著
占據客民後至故所居多山僻磽瘠之區或與土
著相雜處夫土客至相雜處也則因於客民方音
旣已有別又皆堅忍耐勞富有獨立性質所習不
與土著同化於是感情不無扞格彼此或起猜嫌
蓋在咸同間鶴高開恩新等縣稍因土客積嫌竟
爾分聲鬪殺糾紛連年而至於無可收拾職是故

也當是鬪殺時廣肇所屬其他土客雜居諸縣亦
幾遭波及幸賴雙方均多明白士紳遇事會商解
釋互相約束得以弭禍無形不致發生衝突故至
今仍復土客雜處相安無異倘當日其他各縣無
人調解牽入旋渦勢將互鬪範圍日見擴大更爲
不堪設想矣茲因本編所紀溪民始遷乃在清初
康乾之後故將漢晉宋明以前客族遷徙來粵之
源流亦略爲敘述附注於此俾有所參稽焉

雍正十年督糧道陶正中至新甯開平恩平等縣勸
令墾民悉領地開耕時新甯知縣王嵩亦以墾闢自
任詳報省憲開畸畛圖准立新戶升科完納稅糧乾

隆初惠潮嘉人來墾者仍眾至是生齒日繁讀書人
士難歸原籍各請就近入籍考試鶴山高平開平恩
平等縣客民占居者眾得與土民一同應考獨新甯
客民屢請入籍與試皆爲土著所阻迨乾隆二十九
年客童廖洪等赴都察院具控奉諭旨着廣東巡撫
圖薩布查奏經部議覆准新甯另編客籍考試取進
文武生員於是客童有上進之階膺貢舉而登仕版
者代有人矣

客民習勞苦繁生育又善引族屬故所在占籍皆能
自闢村居繁殖人口計由雍乾始遷以迄咸豐初僅
百十餘年鶴高開恩等縣不具論卽新甯一邑客民

人口已不下三十萬而所居地雖多僻瘠以甯邑方

輿計之殆占三分之一焉

以上參廣州府志新甯縣志寧陽雜志

增錄新甯鄉土歷史載客民初來甯邑所居地西
自大龍灣燕子閣三合一帶迄南至橫塘高厚長
塘馬山大隆崗寨門深井大門大湖山那扶一帶
北自蟛蜞塘四九墟五十墟楓樹園迤東至小旗
山五指山赤溪磅礴曹冲等處傍山結廬雖所居
地多磽确然合甯邑方輿計之殆三分之一云云

土客械鬪起原及其蔓延

各縣土客相處百餘年來向無猜嫌

客民因方言與土有別又性堅

毅不苟隨人彼此似難融化解然偶或齟齬一經調停立可冰釋猶相安也

會咸豐四年紅

巾賊起恩平土匪圍撲縣城知縣郭象晉專募客勇
防守時高明開平鶴山等縣城及肇慶府城亦有賊
來攻悉募客勇守之俱無患又開平土匪譚亞受余
兆表等糾集沙河江門等處賊入踞長沙由荻海登
岸圖撲新甯縣城知縣楊德懿調各堡鄉團分防要
隘復諭客紳楊錦瀾等招募客勇到城固守未幾紅
巾土賊大鯉魚何稠仔等攻陷鶴山縣城知縣馬彬
被戕闔署眷役俱及於難尋該縣客紳舉人馬從龍
張寶銘等奉總督葉名琛諭飭統帶客勇協助官軍
收復城池連破沙河江門長沙等賊營擒獲土賊大
鯉魚何稠仔等斬之報聞省憲嘉許客民勇敢奏獎

有差復令新任鶴山知縣沈造舟督同存城千總李其盛統率客勇搜剿餘賊時爲賊目及附賊者多土屬人聞剿懼之乃煽布譟言謂客民挾官剷土土眾惑之因是仇客分聲各分方音也乘勢助匪殺掠客民客民起而報復遂相尋釁焚擄屠戮而成械鬪矣

是時械鬪祇鶴山一隅而他縣土客尙無事隨因開平歇馬梁姓土人有曾附賊者慮官捕治又兼伊族與鄭吳二姓爭山地建村有隙懼爲鄭吳所併思釀土客鬪禍以解之乃賄使土匪迭在塘逢地方伺殺客民稍與抵抗卽乘機追逐焚掠高坪十字路獺弗一帶客村男女多遭誅夷其逃亡得免者皆奔集於

金鷄赤水等處客屬聞之大憤亦糾眾與禦焚燬土民長安吉安歐村雁鵝等十數村居由是而開平土人與客仇鬪之事以起復藉是煽動各縣土屬聯同逐客時土勢強而客寡弱間有土紳亦以爲客易翦除圖佔其村居田產以自利而附和之於是恩平高明等縣土屬又起而與客爲難視凡說客話者皆引以爲敵而鬪禍益烈

咸豐五年有開平土紳梁元桂者時官京師在都察院誣控客民謀叛焚掠請飭粵兵進剿隨奉諭旨着省吏轉府查辦署肇慶府同知李時芳乃以客民保守郡縣各城有功遭土匪仇殺相關等情據實上聞

省吏遂通飭鶴高開恩等縣嚴責釀事士紳交匪懲
治并各派兵勇彈壓均無效嗣是而後互鬪連年如
客民居於鶴山之雙都各堡高明之五坑各堡及開
恩二縣之金鷄赤水東山大田萌底橫坡沙田郁水
尖石等處共二千餘村悉被土眾焚燬擄掠無老幼
皆誅夷死亡無算而鶴高開恩等縣之土屬村落亦
被客民焚燬擄掠千數百區無老幼皆誅夷死亡亦
無算據故老所傳當日土客交綏尋殺至千百次計
兩下死亡數至百萬甚至彼此墳墓亦各相掘毀以
圖洩忿其很慘殆無人道云適是時洪楊肇事各屬
土賊蠭起省吏兼籌剿堵未遑又以土客係屬私鬪

赤溪縣志
而忽之無兵到境制止以致鬪事積年莫解蔓延日

廣迨至六年而新甯土客又遭波及矣

陽江廳

今改縣

及高要陽春等縣土客素本相睦當開

恩等縣土屬分聲仇客時亦被捲入旋渦隨高要陽
春二縣土客紳士能遇事調解鬪事遂歸沉寂至陽
江廳屬客民無多其居於五堡一帶村墟者於咸豐
五六年已多逃避於新甯客屬那琴那扶等處少與
土屬啟鬪祇有禾乂凹林姓各客村富有貲財不欲
遷避約將田產與土人平分聯呈廳署立案互相扶
助故當時得免於禍聞至今林姓各村仍安居無恙

云